

Canllawiau ar awdurdodi ychwanegion bwyd anifeiliaid

Canllawiau ar awdurdodi ychwanegion bwyd anifeiliaid (feed additive) a'r hyn sydd angen i chi ei gyflwyno fel rhan o gais ar gyfer ychwanegion bwyd anifeiliaid.

Mae'r dudalen hon yn rhan o'r [Canllawiau ar wneud cais am gynhyrchion wedi'u rheoleiddio](#)

Mae [ychwanegion bwyd anifeiliaid](#) yn gynhyrchion sydd wedi'u hawdurdodi at ddibenion penodol mewn bwyd anifeiliaid, er enghraifft:

- bodloni gofynion maethol yr anifeiliaid
- gwella ansawdd bwyd anifeiliaid ac ansawdd bwyd sy'n dod o anifeiliaid (hynny yw cig, pysgod, llaeth, wyau)
- gwella perfformiad ac iechyd yr anifeiliaid

Rhaid awdurdodi ychwanegion bwyd anifeiliaid cyn eu rhoi ar y farchnad ym Mhrydain Fawr, a dim ond at y diben a nodir yn yr awdurdodiad y gellir eu defnyddio. Yn gyffredinol maent wedi'u hawdurdodi am ddeng mlynedd.

Nodir cyfraith yr UE sy'n berthnasol i Ogledd Iwerddon ar ôl y cyfnod pontio yn Atodiad II [Protocol Gogledd Iwerddon](#). Mae hyn yn golygu, os ydych chi'n ceisio awdurdodiad newydd i roi ychwanegion bwyd anifeiliaid ar farchnad Gogledd Iwerddon, bydd yn rhaid i chi barhau i ddilyn rheolau'r UE a'i [weithdrefnau awdurdodi](#).

Deddfwriaeth ychwanegion bwyd anifeiliaid

Mae cyfraith yr UE a ddargedwir (retained EU law) yn Rheoliadau [1831/2003](#) a [429/2008](#), yn amlinellu'r weithdrefn awdurdodi ar gyfer y sylweddau hyn ac yn nodi:

- rheolau ar awdurdodiadau ychwanegion bwyd anifeiliaid
- amodau defnyddio ar gyfer ychwanegion
- darpariaethau ar labelu ychwanegion bwyd anifeiliaid a'u rhag-gymysgeddau y mae'n rhaid cadw atynt
- gofynion manwl ar gyfer cyflwyno cais

Cyn gorffen awdurdodiad, rhaid i'r labordy cyfeirio werthuso'r dull dadansoddol a ddarperir gan yr ymgeisydd. Mae'r tasgau a roddir i'r labordy cyfeirio wedi'u nodi yng nghyfraith yr UE a ddargedwir [378/2005](#) ac maent yn cynnwys cynnal samplau o ychwanegion bwyd anifeiliaid trwy gydol y cyfnod awdurdodi.

Proses ymgeisio

I wneud cais i awdurdodi ychwanegyn bwyd anifeiliaid ym Mhrydain Fawr:

1. Defnyddiwch ein [gwasanaeth gwneud cais ar gyfer cynhyrchion wedi'u rheoleiddio](#) i lenwi'r ffurflen gais.
2. Yna byddwch yn cael dolen ddiogel i uwchlwytho'r cais a'r dogfennau cysylltiedig i gefnogi'ch cais, gan ystyried y gofynion yng nghyfraith yr UE a ddargedwir ac fel sy'n briodol yn dilyn canllawiau Awdurdod Diogelwch Bwyd Ewrop (EFSA).
3. Ar y cam hwn, dylech chi hefyd lanlwytho'r ddogfennaeth ar y dull dadansoddol ac unrhyw wybodaeth berthnasol sydd ei hangen ar gyfer y labordy cyfeirio i werthuso'r dull. Os yw'n berthnasol, cyfeiriwch at unrhyw werthusiad a allai fod eisoes wedi'i gynnal gan labordy Cyfeirio'r UE ar yr ychwanegyn bwyd anifeiliaid dan sylw. Gwnewch yn glir yn eich cais os ydych o'r farn bod Erthygl 5(4) o [Reoliad 378/2005](#) yr UE a ddargedwir yn berthnasol a bod yr amodau ar gyfer gosod yr ychwanegyn bwyd anifeiliaid ar y farchnad yn dod o fewn cwmipas dull sydd wedi'i werthuso yn flaenorol.
4. Ar ôl cael eich cais, byddwn ni'n cysylltu â chi i gytuno a nodi'r broses ar gyfer talu unrhyw ffioedd am yr asesiad dadansoddol fel y nodir yn y ddeddfwriaeth. Byddwn ni hefyd yn darparu manylion ar sut i anfon y tri sampl (a safonau) lle bo hynny'n berthnasol i'r labordy Cyfeirio.

Canllawiau manwl ar wneud cais

Yn flaenorol, mae EFSA wedi datblygu canllawiau technegol ar y gofynion ar gyfer coflenni (dossiers) cais. Mae'r canllawiau hyn yn gyffredinol yn parhau i fod yn berthnasol gan fod ein dull yn seiliedig ar brosesau'r UE. Dylech chi ddilyn y rhannau sy'n ymwneud â datblygu coflenni yn unig ac nid y broses ymgeisio:

- [Canllawiau EFSA ar gyfer ymgeiswyr ychwanegion bwyd anifeiliaid](#)

Awdurdodiadau presennol

Os yw eich ychwanegyn bwyd anifeiliaid wedi'i awdurdodi gan y Comisiwn Ewropeaidd (CE) cyn 1 Ionawr 2021 a bod y ddeddfwriaeth angenrheidiol yn berthnasol, bydd yr awdurdodiad hwnnw'n parhau'n ddilys ym Mhrydain Fawr.

Ail-awdurdodi ychwanegion bwyd anifeiliaid

Bydd angen parhau i gyflwyno ceisiadau i'r UE am ychwanegion bwyd anifeiliaid presennol o dan Erthygl 10 o [Reoliad 1831/2003](#) ond nid oes dyddiadau cau ar unwaith ar gyfer gwneud hyn. Byddwn ni'n adolygu'r ychwanegion bwyd anifeiliaid hyn ac yn darparu gwybodaeth bellach am ofynion cyflwyno a therfynau amser maes o law.

Pob cais arall am ychwanegyn bwyd anifeiliaid

Dylid cyflwyno ceisiadau a gyflwynwyd yn flaenorol i'r UE cyn 1 Ionawr 2021 nad yw'r prosesau asesu wedi'u cwblhau ar eu cyfer a cheisiadau newydd am awdurdodiad Prydain Fawr i ni gan ddefnyddio ein [gwasanaeth gwneud cais am gynhyrchion wedi'u rheoleiddio](#).

Mae'r rhain yn cynnwys:

- awdurdodiadau newydd (Erthygl 4 o [Reoliad 1831/2003](#))
- addasu awdurdodiad (Erthygl 13)

- adnewyddu awdurdodiadau (Erthygl 14)

Wrth lenwi'r ffurflen gais, gofynnir i chi ddarparu'ch rhif cwestiwn EFSA lle bo hynny'n berthnasol.

Awdurdodiadau brys

Gellir cyflymu'r broses o ran awdurdodiad brys ar gyfer ychwanegion bwyd anifeiliaid er mwyn sicrhau bod lles anifeiliaid yn cael ei ddiogelu. Gellir rhoi awdurdodiadau brys am uchafswm o bum mlynedd.

Faint o amser fydd fy nghais yn ei gymryd?

Mae'r ddeddfwriaeth yn cynnwys dyddiadau ar gyfer camau allweddol yn y broses. Yn y rhan fwyaf o achosion, bydd ceisiadau'n cymryd o leiaf blwyddyn.

Bydd ansawdd y goflen a'r wybodaeth a ddarperir yn effeithio'n sylweddol ar yr amser sydd ei angen ar gyfer asesu ac awdurdodi. Rydym ni'n annog ymgeiswyr i ddilyn y canllawiau a darparu cymaint o wybodaeth â phosibl i sicrhau y gallwn ni brosesu'ch cais mor effeithlon â phosibl.

Cymorth

Os oes gennych chi unrhyw gwestiynau am y weithdrefn awdurdodi neu'r gofynion gwneud cais, gallwch chi gysylltu â ni drwy regulatedproducts@food.gov.uk

Gwneud cais am awdurdodiad

Gallwch chi wneud cais i awdurdodi ychwanegyn bwyd gan ddefnyddio ein [gwasanaeth gwneud cais am gynnyrch wedi'i reoleiddio](#).